

Apicoltura, unu settore de importu tentu pagu in contu

Sa leze quadru nazionale n. 313/04 e sa leze regionale n. 19/2015, reconnoschent s'apicoltura comente atividade de importu e de profetu mannu pro s'amparu de s'ambiente naturale, de s'ecosistema e de sa massaria in zenerale.

S'abe azudat a mantènnere s'echilibriu ecolòzicu e a mezorare sa calidade de s'ambiente e est finas unu sinnu de bundu de s'istadu de salute de s'ambiente, ca faghet finas de bàrdia ambientale.

Inchertas reghentes ant bogadu a craru s'importu de sas abes pro allestrare sa crèschida de s'erva a pustis de sos fogos, contra a sa desertificatzione e a s'impoverimentu e a su degradu de sos terrinos e a àteros desacatos, chi semper de prus sunt capitende, mascamente in Sardinna.

S'obera issoro est a beru de v`allia pro s'amparu de sa biodiversidade e pro su traballu de sos massàjos cun s'impoddinonzu de sas prantas de frutora e de s'ortu. Dae s'impoddinonzu de sas abes, difatis, dipentet sa calidade de sa mela, sa pira, sa cariasa, su piricoco, sa sindria, su melone, sa tamata, sa corcoriga, sa chibudda, ma finas de su forazu pro su bestiàmene.

Un traballu de su cale non si podet f`aghene a mancu, duncas, ma chi est menetadu dae sos cambiamenti de su tempus. In antis de totu, s'aumentu de sa temperadura de su pianeta chi custringhet sas abes a cambiare logu e a s'ispostarent frecuente pro chircare zassos prus friscos.

E a pustis sos beranos primidivos e fritu foras de tempus. Custu cheret n`arrere chi b'at p`oddine e n`etare in sos froes a diponimentu de sas abes candu galu non sunt galu a tretu de lu collire e, a su tortu, no nde buscant cando lis diat bisonzare.

Mancari s'apicoltura fagat custu traballu de v`allia non pigat contributos de sa Política Agrìcula Comunitària (Pac) in cantu non si podent bortare sos mòjos in UBA. E tando tocat de pessare ite si podet f`aghene ca si nono sos abiaresos non podent leare parte a cussas Misuras inue bi cheret su càricu UBA (Benistare animale, Biolòzicu e Indennidade cumpensativa).

In Sardinna, in su sartu, dae sos datos de Laore a su 31 de nadale de su 2020, resurtat chi b'apet 72.000 mòjos cuidados dae 2.030 mojaresos de sos cales 450 sunt profesionales. Su restu produint mele pro su consumu issoro e ant prus pagu de 10 mòjos, comente previdet sa leze regionale n. 19/2015.

Sa bona parte de sos mòjos s'agatant in sa Sardinna meridionale (sa provìntzia betza de Casteddu pro nos cumprèndere), pagu prus o mancu su 48% de sos abiaresos e su 52% de su mele produidu.

In Sardinna onzi annu si produint 25.000-30.000 cuintales de mele. In sos ùrtimos annos, pro culpa de su cambiamentu de su clima, sa produtzione est minimada e s'est firmada a 15.000-18.000 cuintales.

In Sardinna b'at diferentes gastas de mele a segundu de sa zenia de pàsculu de sas abes: su'80% de sa produtzione est de mele millefrores e ocalitu. Su restu est de iscraria, gardu, castanza, ghiddostre, trioze e sudda. Su mele de lidone, su mele rànchidu, est una mìnima parte, su 0,3% ebia de totu sa produtzione.

Importamus pagu prus o mancu 35.000 cuintales de mele onzi annu, mascamente dae s' Amèrica latina, e dae sos paisos de s'est Europa, su prus dae Sèrbia, Slovènia, Ucràina, Romania.

Su 60% de su mele sardu, e su 90% de su mele importadu, l'impreant pro fàghere durches, su restu est consumandu diretamente.

Noas bonas arribant dae su *Programma nazionale triennale* chi ponet 300.000 euros pro mezorare sa produtzione e sa bèndida de sos produtos de s'apicoltura.

In prus s'assessoradu regionale de sa Massaria, de reghente, at publicadu su *Programma apistico regionale* pro su 2021/2022. Podent fàghere dimanda sos mojahresos chi sunt in règula cun sa *Banca Dati Apistica* (BDA) e ant nessi bìndighi mòjos. Si podent finantziare mòjos, abieras, trastis e meighinas. Sa dimanda andat fata intro su 30 de santandria de su 2021.

Gràtzias mannu a Massimo Licini de s'ufitziu de Laore de Pula pro su bonu grabu e sa disponibilidade a mi dare sos datos de su compartu in Sardinna.